

կեր է ներկայացնում վերոյիշեալ 867,671 թիւը (եւ կամ պլիւս, բոլշեւիկ վարիչների ցանկութեամբ, շուրջ 50 հազար) :

Նկատի ունենալով սակայն 1924-ին Անդրկովկասում եւ 1925 թուի յունուար 1-ին Հայաստանում տեղի ունեցած վարչական վիճակադրութիւնը, որի համաձայն 1925 յունուար 1-ին Հայաստան ունեցել է 910,000 բնակիչ, եւ որից 782 հազարը (ասել է՝ 86 առ հարիւրը) հայ, 90 հազարը թրքո-թաթար, 18,480-ը ռուս, 13 հազարը եղիդի, եւայն, ենթադրելով նաեւ, որ 1924-ի ու 1926-ի տուեալների մէջ տոկոսային խոչոր տարբերութիւն չէր կարող ներկայացնել Հայաստանի ազգաբնակչութիւնը ըստ ցեղային կազմի, ապա ուրեմն ընդունել պէտք է, որ 1926-ին եւս (այժմ էլ նոյնը) հայութիւնը կազմել է ու կազմում է 86% երկրի բնակչութեան :

IV

Յետագայ տողերի մէջ կանգ կ'առնենք անդրկովկասեան մեր հարեւան երկիրների՝ Վրաստանի եւ Ադրբէջանի հողային ու ազգաբնակչական կարողութիւնների վրայ եւս : Բաղդատութեան համար այժմէն իսկ զրի առնենք մի քանի թուեր եւ անցնենք :

Այն է՝ Հայաստանի 30,000 քառակուսի քիլոմէտր (26,555 քառ. վերստ, այլ տուեալներով՝ 26,358 վերստ տարածութեան) եւ 867,000 բնակչութեան (1926 դեկտ.) դիմաց՝ Ադրբէջանը ունի շուրջ 86,000 քառ. քմ. (74,989 քառ. վերստ) տարածութիւն եւ, համաձայն 1926-ի վիճակադրութեան, 2,301,788 բնակիչ : Վրաստանն ունի շուրջ 69,000 քառակուսի քիլոմէտր (60,282 քառ. վերստ) տարածութիւն եւ 2,621,019 բնակիչ :

Ընթերցողը շարունակ յիշելո՛ւ է այս թուերը : Դրանք մեզ ստում են ուրեմն, որ Խորհրդային Հայաստանը տարածութեամբ 2/3 անգամ փոքր է Խորհրդային Վրաստանից, զբրեթէ 3 անգամ էլ՝ Խորհրդային Ադրբէջանից : Ինչ ազգաբնակչութեան թուին է վերաբերում, մեր հայրենիքը իր արդի սահմաններում հաշուում է ուրեմն 3 անգամ աւելի պակաս ժողովուրդ քան Վրաստանը եւ 2 2/3 անգամ էլ պակաս՝ քան Ադրբէջանը :

Այս թուական իրողութիւնները ամենակենսական, բախտորոշ նշանակութիւնն ունին ինչպէս շատ եւ շատ, այնպէս եւ մեր ազգային քաղաքականութեան պարզաբանման եւ յստակ ձեւակերպման տեսակէտից : Դրանց բաղադրական եւ քաղաքական արժէքին անցնելուց առաջ տեսնենք սակայն, թէ Հայաստանի քնակչութիւնը մի կողմից եւ հայ բնակչութիւնը (Անդրկովկասում) միւս կողմից ինքն իր մէջ ի՞նչ պատկեր էր ներկայացնում նախապատերազմեան շրջանում եւ ինչ՝ մեր օրերում :

Ուրիշ խօսքով՝ վերահասու լինինք փոքր ինչ, թէ Հայաստանը եւ Անդրկովկասեան հայութիւնը ազգաբնակչական ի՞նչ շարժումներ է ցուցահանում, ինչ բաղդատութիւն է ներկայացնում ի՞նքն իր մէջ, անցեալը եւ ներկան աննելով որպէս համեմատութեան եզրեր : Այդ հարցերի պատասխանն էլ ցոյց կը տայ մեզ քաղաքական այն հաւանական տենդենցը, որ յատուկ պիտի լինի նրան, բխի նրա թուական իրականութիւնից :

1897-ի համառուսական վիճակագրութեամբ՝ հայերի թիւը Անդրկովկասում հաշոււում էր 1,086,980, իսկ ամբողջ կովկասում՝ 1,118,094 : Կովկասից դուրս, մնացեալ Ռուսաստանում, հայերի թիւն էր նոյն 1897-ին՝ 55,002, որով ամբողջ Ռուսաստանում ապրում էին 1,173,096 հայեր :

1897-ի թուական տուեալները յարմար են բաղդատութեան տեսակէտից թէ՛ նրա համար, որ գէթ մօտաւոր չափով ստո՛յգ են եւ թէ՛ միւս կողմից, ժամանակադրական տեսակէտից : Այդ իսկ նկատի ունենալով, այս կարակցութեան մէջ յիշատակենք նախընթաց ժամանակաշրջաններին եւս վերաբերող մեզ յայտնի մի քանի թուական տուեալներ :

Այսպէս, Անդրկովկասի հայութեան թիւը 1838-ին, նայելով վարչական այն վիճակագրութեան, որ կազմակերպել էր ժամանակի ռուս իշխանութիւնը եւ որի ամփոփումը տուել են Փոն Շոպէն եւ Փոն Քէօպէն, եղել է 294,606 :

Փոն Շոպէնը (von Chopin) երկար տարիներ Անդրկովկասում վարելիս է եղել ելեւմտական պատասխանատու պաշտօն եւ, աւելի քան մի ուրիշը, ծանօթ տեղական պայմաններին :